

T'AÏME
(en dialecte nimois)

Oh ! t'aïme d'un amour sincèro ;
Siès poulido coumo un anel.
Dèves estre un anjo sus tèro
Car proché tus mé crése ou ciel !
Yun dé tus, gneuch et jour souspire
Et mé trove bèn, malurous,
Car mé foou, à iéou, toun sourire,
Et toun régar pér estre urous !

T'aïme, crei-z-ou, ma mïo douço,
Coumo lou roussignoou dou cham
Aïmo dé canta sus la mousso
En vèsèn lou sourel couchan...
T'aïme coumo la margarido
Aïmo lou gazoun véloussa,
Coumo la rosèto éspandido
L'aouro que la faï balança...

T'aïme maï qué yiou, ma Sézèto,
T'aïme et sieï jalous coumo un viel ;
Jalous dé ta bouco panléto.
Dé tis yeul blu coumo lou ciel.
Sieï jalous dé ti papiyoto,
Sufis qué tocoun toun col blan,
Jalous dou ruban ver qué floto
Sus toun coursaje dé quinze an !

Voudriei estre la cansounéto
Qué cantes tout ou long dou jour,
Ou la blanco tourtouréléto
Qué té faï souspira d'amour.
Voudriei, quan ploures èn silenço,
Té counsoula dé réscoundoun
Voudriei èmpourta ta souffrènço
Et ti larmo dins un poutoun.

Voudriei quan lou tèm és bèn nivo
Estre lou sourèl pér brya ;
Voudriei estre, quan siès pénsivo,
La caouso qué té faï pénsa ...

Voudriei estre tou sus la tèro
Pér estre quicon qué té plaï ;
Estre ta sur, estre toun frèro,
Bélèou m'aïmariès un paou maï !

Antoine BIGOT